

## Malaysia Perlu Amalkan Pembangunan Lestari : Ketua Menteri

Terakhir dikemaskini: Rabu, 18 September 2019 14:09 | [Cetak](#) | Jumlah paparan: 66

Kongsi 0

Syorkan 0

Kongsi

Share



**RABU, 18 SEPT** - Ketua Menteri Sabah, Datuk Seri Panglima Mohd Shafie Apdal berkata Malaysia perlu mengamalkan pembangunan lestari dalam usaha menjadikan negara ini sebagai negara

berpendapatan tinggi menjelang abad ke-21.

Katanya, Malaysia telah menekankan penggunaan teknologi hijau menerusi pelbagai inovasi sebagai alat untuk pembangunan lestari bagi meminimumkan kemusnahan alam sekitar.

“Ia pada masa sama dapat menggalakkan dan mengekalkan alam sekitar untuk melestarikan segala bentuk kehidupan,”ujarnya.

Beliau berkata demikian dalam teks perasmian Persidangan Ekonomi Antarabangsa (ICE) 2019 anjuran Fakulti Perniagaan, Ekonomi dan Perakaunan (FPEP) Universiti Malaysia Sabah (UMS) yang dibacakan oleh Pembantu Menteri Kewangan, Sharifuddin Hata, kelmarin.

Tambah beliau, pembangunan global bukan hanya merupakan tanggungjawab kerajaan semata-mata, tetapi ia juga merupakan tanggungjawab masyarakat secara menyeluruh.

“Kita harus bekerja secara kolektif sama ada di peringkat negeri, nasional dan global. Usaha kita perlu dilakukan secara berterusan dan berkesan bagi mencapai matlamat bersama,” katanya.

Terdahulu Naib Canselor UMS, Profesor Datuk Dr. Taufiq Yap Yun Hin berkata pembangunan lestari di negara ini harus mengambil kira tentang keadilan sosial, keperluan asas manusia, kesihatan awam serta kesedaran alam sekitar.

Katanya, kesihatan ekonomi bandar adalah pemacu ke arah kelestarian dengan mempertimbangkan peruntukan sumber, pelupusan sampah secara mampan dan pengurangan tahap pencemaran di kawasan bandar.

“Kita sebagai satu negara perlu memberi tumpuan kepada pembangunan aktiviti ekonomi, peluang pekerjaan serta pembasmian kemiskinan,” ujarnya dalam teks ucapan yang dibacakan oleh Dekan FPEP, Profesor Madya Dr. Raman Noordin.

Persidangan selama dua hari itu disertai oleh kira-kira 150 peserta dari dalam dan luar negara termasuk China, Indonesia , Jepun, Korea Selatan, dan Nigeria.